

**Lita Nampa 2 Peterlu
Walkatjunkunytja
2 Peter
Nyangatja Nganmanytju
Nyakula Wangkanytjaku**

Nyangatja Godaku tjukurpa Peterlu walkatjunkunytja Jesuku walytja kutjupa tjutaku Jerusalemala patu nyinanytja tjutaku. Paluru lita kutjara walkatjura palula tjanalakutu iyanu, ka lita nyangatja malatja paluru ilunytja kuwaripangka walkatjunkunytja. Munu lita nyanga palula paluru wangkara ngulutjunangi tjukurtjara ngunti tjutangka-tawara alatji wangkara, "Kuwari anangu kutjupa tjuta ngunti nintilpai tjuta nyuralanguru pakalku munuya tjukurpa kutjupa tjuta nyurala wangkara ngunti nintilku tjukurpa Godalanguru wiyatja tjana walytjangku kulintja. Munuya nyuranya ngunti kurara mauntankuku nyura Godalawanu tjukaruru nyinanyangka."

Munu Peterlu tjananya wangkara kunpuningi ngunti nintilpai tjuta kulira wantinytjaku munu tjukurpa mulapa kutju kulintjaku munu wirura palyanyku nyinanytjaku. Munu paluru tjanala wangkangi watarkuriwiyangku kulintjaku panya mulapa Jesunya ngula malaku pitjanyi palumpa walytja tjuta ngura wirukutu katinytjikitja palula junguringkula wanka titutjara nyinanytjaku.

Tjukurpa nyanganpa ngarinyi:

1:1-2 Peterlu nganmanytju wangkanytja

1:3-21 Godalulanya ngurkantankunytja Christanya purunypa wirura palyanyku nyinanytjaku

2:1-22 Peterlu ngulutjungkunytja ngunti nintilpai tjuangka-tawara

3:1-18 Jesunya malaku pitjanytja tjukarurungku kulintjaku

Peterlu Nganmanytju Wangkanytja

¹ Uwa, Jesuku walytja tjuta, ngayuluna Simon Peternya Jesuku Christaku tjukurtjara, panya paluruni witura iyanu palumpa tjukurpa anangu tjuangka wangkanytjaku. Kana lita nyangatja nyurampa walkatjunanyi, panya nyura nganana purunypa alatjitu Jesuku Christaku pulkara mulamularingu wantinytja wiya. Panya paluru Godanya, nganampa panya wankarunkupainya munu panya tjukaruru alatjitu nyinanyi. Kala nyara palulanguru palula wanganarangku kulilpai panya paluru tjukarurungku nganampa palyanu wiru mulapa.

² Uwa, nyura panya Godaku Mayatja Jesuku kulu nganmanypa nintiringu munu nyura kuwari palumpa walytjapiti nyinanyi. Ka Godalu nyuranya titutjarangku mukulyangku kanyinma munu nyuranya kurunpa rapara pukulmanama.

Christanya Purunypa Wirura Nyinanytjaku

³ Nganana ninti Godaku panya paluru witulya pulka alatjitu nyinanyi palya mulapa.

Panya paluru nganaanya ngurkantanu palunya arkara tjukaruru wiru mulapa nyinanytjaku. Munu paluru nganaanya kutjupa kutjupa uwankara ungu wiru tjuṭa, nganaṅa kunpuringkula Jesulawanu tjukaruru palyanyku nyinanytjaku.

⁴ Uwa, Godalu nganaanya wirungku kalkunu aṭunymara kanyintjikitjangku nganaṅa Jesunya purunypa wirura palyanyku nyinanytjaku kura uwankara wantira. Panya manta winkingkaya anangu kura tjuṭa nyinanyi panya tjana kuraku unngu mukuringkunyttatjanungku titutjarangku kura palyalpai. Palu Godalu nganaanya kunpuntjikitjangku kalkunu nganaṅa kura uwankara wantira Godalawanu tjukaruru nyinanytjaku.

⁵ Uwa, nyura panya Godalawanu nyinanytjik-itja mukuringkula nganmanypa palumpa mulamularingu. Munu mulamularingkunyttatjanu nyura uti palya mulapa titutjara nyinama munuya Godaku nintiringama palumpa tjukurku kulu.

⁶ Munuya palumpa nintiringkula walytjangku kulira tjukaruru alatjiṭu nyinama kutjupangku ngunti wituwitunnyangka kulira wantira. Munuya tungun-tunguntu Godanya waṅanma pakuringkunyttja wiyangku, munuya palulawanu kutju titutjara palyanyku nyinama.

⁷ Munuya Jesuku walytja tjuṭaku pulkara pukularima munuya uwankarakuṭu mukulya ngaltunyttju nyinama.

⁸ Uwa, alatji nyura uti rawa nyinama Godalawanu wiru mulararinyttjikitja. Kaya kutjupa

tjuṭangku nyuranya wirura tjukaruru nyinanyangka nyakula kulilku, “Ai, mulapa nyanga paluru tjana Mayatja Jesuku ninti nyinanyi, panya paluru tjananya kunpuṇu war̄ka wiru mulapa palumpa palyantjaku.” Alatjiya nyuranya nyakula kulilku.

⁹ Palu tjinguru nyura kutjupatjara palu purunypa wirura nyinapai wiya, munuya wiru mulararinytjikitjangku kulintja wiya. Kaṇa kulini nyura kuru pati purunypa watarku nyinanyi, panya nyuranya Godalu kura tjuṭa nganmanytju palyantjitjanguru kalypangku wantingu nyura kura wantira war̄ka wiru tjuṭa kutju palyantjaku. Palu nyura tjinguru ara nyanga palumpa watarkuringu munu panya anangu kuru pati purunypa nyinanyi kulintja wiyatja.

¹⁰ Uwa walytja tjuṭa, mulapa panya Godalu nyuranya ngurkantanu palumpa walytja mulapa nyinanytjaku, ka nyura uti palumpa walytja alatjiṭu nyinama munu palunya wanganrangku kulilkatima wantinytja wiyangku. Panya alatji nyinara nyura punkantja wiya kunpu titutjara nyinaku.

¹¹ Ka nyara palulanguru Mayatja Jesulu Wankarunkupailu nyuranya ngula pukultu alatjiṭu katiku ngura wirukutu nyara palula nyuranya titutjarangku wirura kanyintjikitjangku.

¹² Tjukurpa nyanga palumpa panya nyura ninti nyinanyi nganmanytju kulintjatjanu, munu panya nyura rawangku kulilkatinyi. Palu

palya, rawangkuna nyurala wangkanyi nyura watarkurinytjaku-tawara.

13-14 Panya ngayulu ankunytjaku tjintu watalpi ilaringanyi, panya Mayatja Jesuluni nganmanytju tjakultjunu. Kana palulanguru tjukurpa nyangatja wanka nyinaralpi nyurala wangkanyi nyura rawangku kulilkatinytjaku.

15 Mununa palulanguru nyiri tjutangka kulu tjukurpa walkatjunanyi ngayulu ilunyangka nyura nyakula kulintjaku watarkurinytja wiyangku.

Jesunya Witulya Pulka Nyakunytja

16-18 Uwa, panya tjakultjununa nyurala nganmanytju Mayatja Jesunya Christanya malaku pitjanytja witulya pitalytji pulka mulapa. Panya nganana walytjangku pinangku kulira wangkanytja wiya, palu nganana mankurtu kurungku nyangu Jesunya puli katu ngaranyangka Mosela pulala Ilaitjala tjungu. Munula ngarala nyangangi Mama Godalu Jesunya pitalytji pulkangku irnyara kanyinnyangka munula kulinu Godalu ilkaringuru wangkanyangka nyanga alatji, "Nyangatja ngayuku katja, kana palumpa pulkara pukularinyi."

19 Panya iritiya Godaku wangkatjara tjutangku tjakultjunangi wati wiru mulapa mala pitjanytjaku. Kala kuwari Jesunya nyakunytjatjanu tjukurpa panya tjana wangkanytjitjaku pulkara mulamularinganyi.

Ka nyura kulu uti tjukurpa palunya tjananya pulkara kulinma, panya wangkatjara

tjuṭangkuya tjukurpa tilitjara tjakultjunangi. Panya tilingku mungawalurungka irnyara utilpai, palu purunypa panya tjukurpa paluru nyurala utiringu, ka nyura utilta kulini. Ka tjukurpa paluru titutjarangku utini ngula Jesunya malaku pitjanytjakutu-wangkara. Ka paluru pitjanytja nyaa purunypa, panya kililpi Katanya tjiṅtukutu pakalpai kala nyakula kulilpai, "Kuwari tjiṅturinganyi." Nyara palu purunypa Jesunya malaku wirkankunyangka nyakula nganaṅa kulilku, "Panya paluru wirkanu." Kaya nyara palumpa pitjanytjaku patara tjukurpa nyanga palunya rawangku kulilkatima.

²⁰⁻²¹ Palu nyangatjaya kulinma, panya wangkatjara tjuṭangku iriti tjana mukuringkula walytjangku kulintjitja nyiringka tjunkunyitja wiyatu. Palu Kurunpa Milmilṭu tjanala unngu nintinnyangka kutju tjana wangkangi munu walkatjunangi. Ka nyuntu nganaṅa uwankara kulu palu purunypa nyinanyi, panya Kurunpa Milmilṭu nganaṅanya nintinnyangka kutju nganaṅa Godalu wangkanytja uwankara tjukarurungku kulilpai.

2

Ngunti Nintilpai Tjuṭa

¹ Palu panya wangkatjara ngunti tjuṭaya iriti nyinangi Godaku anangu tjuṭangka tjungu. Nyara paluru tjana Godalu wituntja wiyatja. Ka palu purunypatu kuwari anangu kutjupa tjuṭa ngunti nintilpai tjuṭa nyuralanguru pakalku munuya tjukurpa kutjupa tjuṭa

nyurala wangkara ngunti nintilku tjukurpa Godalanguru wiyatja tjana walytjangu kulintja. Munuya nyuranya ngunti kurara mauntankuku nyura Godalawanu tjukaruru nyinanyangka. Panya Mayatja Jesunya tjanampa ngalkilpa anga-ilungu paluru tjana kura nyinanyangka munu tjananya wankarunu palumpa walytjaringkunyjtaku. Palu paluru tjana Jesunya mayatja wiyanmankunyangkampa ngula tjiñtu malatjangka Godalu tjananya pika pulka mulapalta unkkuku.

² Palu Jesuku walytja kutjupa tjtutaya tjinguru palumpa tjanampa tjukurku mulamularingkuku munuya palula tjanala tjunguringkula kuraringkuku munuya kuri kutjupa kutjupaku mukur-ingkula ngunti-ngunti altiku. Kaya nyara palulanguru anangu tjtutangku tjananya nyakula Godanya anara kuralku wangkara, “Godaku tjukurpa tjukaruru wiya.”

³ Panya ngunti wangkapai nyara paluru tjana maniku manyu munuya nyurala ngunti wirura wangkapai palyangku-palku nyura palunya tjananya mani unkkunyjtaku. Palu panya iritinguru alatjitu Godalu tjananya nyangangi munu kuliningi ngula palunya tjananya pika pulka mulapa unkkunytjikitjangku.

⁴ Panya iriti angelpa kutjupa tjtutangku Godala pulkara tungunpungu munu kuraringu. Ka Godalu tjananya ngura kurakutu waningu mungawalurungka rawa nyinanyjtaku tjiinangka karpira wantinytja purunypa. Kaya ngura nyara palula rawa patara nyinaku ngula tjiñtu malatjangka Godalu tjananya kura

ngurkantara tjarantjaku munu tjananya pika pulka mulapa ungkunyjtaku.

⁵ Ka ara kutjupa palu purunypa ngarangi, panya Noah-nya nyinanytja-arangka anangu tjutangku Godala pulkara tungunpungkula kura kutju palyanangi. Ka wati kutjungku Noah-lu arkara tjananya wangkara puṭu tjukaruruningi Godalawanu tjana tjukaruru nyinanytjaku. Palu tjana Noah-nya kulintja wiyangku alatjitu wantingi. Nyara palulanguru Godalu tjananya uwankara ngalturingkuwiyangku mina pulkangka iluntara wiyanu, palu Noah-nya munu palumpa walytja tjuṭa kutju wankarunu anangu panya 8 kutju.

⁶ Kaya piruku kulinma ara kutjupa ngura panya pulka kutjara ini panya Tjatamanya pulanya Kumaranya. Panya iriti tawunu nyara palula pulala anangu winki kura pulkaringu munuya kura kutju titutjarangku palyanangi rawangku. Ka nyara palulanguru Godalu panya waru pulka tjanalakutu iyanu ilkaringuru. Ka tawunu panya palunya pulanya kampara wiyanu alatjitu anangu winki. Nyanga alatji Godalu palyanu anangu ngura winkitjangku kulira nintiringkula kulintjaku, "Munta mulapa Godalu nganannya ngapartji palula tungunpungkungangka palu purunypatu palyalku."

⁷⁻⁸ Munu nyura uti wati panya Lotanya kulu kulinma, panya wati nyara paluru ngura nyara palulatu nyinangi, Tjatamala. Palu nyara paluru wati palya Godalawanu tjukaruru nyinapai munu panya tjananya kura kutjupa kutjupa tjuṭa palyannyangka

nyakula pulkara tjituru-tjitururingu, panya anangu nyara paluru tjana Godala pulkara alatjitu tungunpungangi. Ka panya Godalu ngura Tjatamanya pulanya Kumaranya waru pulka ilkaringunguru iyara uwankara alatjitu wiyanu, palu waru iyantja kuwaripangka paluru Lotanya-wararanku pakaltjingara iyanu ankula wankaringkunyjtaku.*

⁹ Uwa, tjukurpa nyanga palunya tjananyaya kulinma munuya nyanga tjanalanguru nintiringama nyanga alatji, panya mulapa Godalu anangu tjukaruru nyinapai tjuta kutju wankarunkupai kura kutjupa kutjupa tjuta tjanala utiringkunyangka. Munu paluru kura palyalpai tjuta wantir'iyalpai pika pulkatjara titutjara nyinakatinyjtaku tjirirpi malatjakutu-wangkara, panya nyara palula ara paluru tjananya ngurkantara tjaralku munu tjananya pika pulka mulapalta unkkuku.

¹⁰ Panya kutjupa tjaraya Godala pulkara tungunpungkupai nyinanyi munuya tjana mukuringkunyjtaja kutju palyalpai kura kutjupa kutjupa tjuta kutju, munuya kuri walytjatjarangka ngaripai, ngunti wangkapai munuya kanany-kananytju ilkaritja tjuta anara warkipai kuntaringkunyjtaja wiyangku.

Palu mulapa Godalu tjananya watarkurinytja wiyangku nyanganyi ngula tjirirpi malatjangka ngurkantara tjarantjikitjangku munu tjananya uwankara wiyantjaku.

¹¹ Panya angelpa tjutaya witulya pulka mulapa

* 2:7-8 Genesis 19:1-29

nyinanyi ngunti nintilpai tjutangka mun̄kara alatjitu munuya tjinguru tjananya uwankara anara warkinyangka wantir'iyalku. Palu wiya, tjana alatji palyalwiyangku wantipai, panya nyara paluru tjanaya Godala mirangka ngaranyi munuya paluru tjana ngurkantara tjaralpai wiya.

¹² Panya ngunti wangkapai tjutangkuya putu kulilpai munuya kutjupa kutjupa tjuta watarkungku alatjitu palyalpai tjukarurungku-palku. Munuya kutjupangku tjukurpa wiru wangkanyangka putu kulira analpai alatjitu. Paluru tjana kuka tjuta purunypa nyinanyi, panya kuka tjuta watarku para-ngarapai pungkula ngalkuntjaku kutju. Palu purunypatu anangu ngunti wangkapai tjuta para-ngarapai, ka kuka purunypa tjananya pungkula wiyalku.

¹³ Panya tjana kura kutju palyalkatinyi, ka Godalu ngapartji tjananya paira iyalku ngura kurakutu pika pulkatjara titutjara nyinanytjaku.

Panya anangu nyara paluru tjana pulkara pukularinytjikitjangku tjana mukuringkunyitjita kutju rawangku palyalpai munuya kalala alatjitu anangu tjutangka mirangka mai pulka tjunguringkula ngalkula tjikira tarangkarira mirapai kunta wiya alatjitu. Tjana nyurala maiku palya-palku tjunguringkula pulkara ngalkula tjikilpai ka panya nyura tjananya nyakula pulkara kuntaringkupai tjana kura tjuta rawangku palyannyangka.

¹⁴ Munuya kungka kutjupa tjuta titutjarangku nyakula mukuringkupai tjanala ngarinytjikitja munuya pakuringkula wantinytja wiyangku

titutjarangku kura kutju palyalpai. Munuya Jesuku walytja kutjupa tjuta kunpu wiya ngaranyangka tjananya wituwitulpai piruku kura palyantjaku munu Godalanguru paturingkunyjtaku. Panya tjana mukuringkula palyalpai tjana mukuringkunyjtija tjuta kutju. Ka nyanga palulanguru Godalu tjananya pungkuku.

¹⁵ Panya tjana Godaku iwara tjukaruru wantira kawankatingu munuya Pailamaku arangka ngaranyi. (Wati nyara paluru panya Piiyaku katja.) Panya nyara paluru manikitjangku pukultu kura palyanu.

¹⁶ Wati nyanga paluru panya Godaku wangkatjara nyinangi, palu palumpa tangkiyingku palula wangkangu munu palunya painu kura panya palunya palyalwiyangku wantinytjaku.

¹⁷ Uwa, panya wangkatjara ngunti wangkapai tjutaya kapi tjukula pilti purunypa ngaranyi, panya anangu tjuta pitjapai tjanala tjukurpa kulintjikitja, palu putuya tjukurpa mantjilpai tjanalanguru. Munuya paluru tjana ngangkali kapi wiyatjara purunypa ngaranyi, panya walpa pulkangku untulpai ka mapalku wiyaringkupai, nyara palu purunypa tjana nyinanyi tjukurpa wirura wangkanytja wiya. Ka Godalu tjananya kalkunu mungawalurungka alatjitu tjana titutjara nyinanytjaku maru mulata.

¹⁸ Panya tjana kanany-kananytju kurakura tjuta titutjarangku wangkapai. Munuya anangu kuwari kutju Jesuku walytjaringkunyjtija tjuta wangkara mukumukulpai paluru tjana piruku

kura panya palunya tjananyatu palyantjaku, panya tjana nganmanytju Jesuku walytja wiyangku palyaningi, panya palunya tjananya palyantjaku tjananya piruku wituwitulpai.

¹⁹ Munuya tjanala alatji wangkapai, ngunti panya wangkapai tjuṭangku, “Palya, nyura mukuringkulaya palyanma, nyura mukuringkunyjtjita tjuṭa kutju.” Alatji tjana wangkapai, palu paluru tjana puṭu palyanyku nyinapai munuya tjana kura tjuṭa kutju palyalpai tjana kuraku mukuringkunyjtjita kutju. Panya kutjupa tjuṭa tjailangka unngu nyinapai kura palyantjatjanu munuya puṭu pakani tjailanguru, palu purunypa anangu kura palyalpai tjuṭa puṭu kuranguru pakalku.

²⁰ Panya nganmanypa tjana Godaku wangkatjara nyinangi Jesuku walytja munuya kura tjuṭa wantingu alatjitu Godalanguru paṭuringkunyjtjaku-tawara. Panya tjana nintiringu Mayatja Jesuku Christaku nganampa panya Wankarunkupaiku. Palu palula malangkaya piruku kuraringkula kurangka anu, ka kurangu tjananya tjiinangka purunypa karpira kanyini. Ka nganalu tjananya wankalku? Wiya alatjitu.

²¹ Panya tjana Tjukurpa Palyaku nintiringkunyjtjanu kurakutu malaku anu, ka tjanampa wankaringkunyjtjaku wiyaringu alatjitu. Anangu watarkitja tjuṭa iwara palyaku ngurpa nyinanyi, ka ala alatjitu ngaranyi paluru tjana kulira mulamularingkunyjtjaku munu wankaringkunyjtjaku. Palu nyanga paluru tjana ngurpa wiya ninti nyinanyi nganmanypa

Jesuku walytjaringkula, munu panyaya iwara palya wantira Godaku tjukurpa milmilpa kulira wantingu alatjitu, munuya kurakutu malaku anu.

²² Panya nyiringka ngaranya tjukurpa palu purunypa anangu tjutangu wangkanytja nyanga alatji,

“Papangku ulkapatjunkula wantikatipai munu piruku malakungku pitjala ulkapa panya palunya tu ngalkupai.” *

Ka palu purunypa tjukurpa kutjupa alatji ngaranya,

“Panya pikipiki paltjinnyangka wirtjapakara tjulpirta malaku tjarpara kutinkatira piruku kuraringkupai.”

Ka ngunti wangkapai tjuta nyanga palu purunypa ngaranya, panya tjana Jesuku walytjaringkula iwara palyangka anangi, palu paluru tjana iwara palya wantira malaku kurakutu anu, panya papa munu pikipiki purunypa.

3

Jesunya Malaku Pitjanytja

¹ Uwa walytja wiru tjuta, ngayulu pulkara mukuringanyi nyura tjukarurungku kutju kulin-tjaku pina alangku. Panya ngayulu alatji nyuranya wangkara wituwitu nu lita panya nganmanyitjangka, panya ngayulu mungatu nyurampa walkatjura ma-iyanu, panya palula. Munu nyangana kuwari piruku tu nyurampa

* 2:22 Proverbs 26:11

walkatjunanyi nyura rawangku tjukarurungku kutju kulintjaku.

² Panyatjaya rawangku kulinma, panya Godaku wangkatjara tjuťangku iriti wangkangu ngula utiringkunyťjaku, munuya piruku kulinma tjukurpa panya Mayatja Jesulu palumpa iyantja tjuťangka wangkanyťja, panya paluru tjana nyurala nganmanyťju tjakultjunu.

³ Munuya panyatja rawangkuťu kulinma, panya Jesunya malaku pitjanyťjaku ilaringkunyangka anangu analpai tjuťa utiringkuku munuya tjana walyťjangku kulira kutjupa kutjupa kura tjuťa palyalku tjananku mukuringkunyťjitja kutju. Munuya paluru tjana nyuranya Jesuku mulamularingkunyangka wiyanmarā wangkaku alatji,

⁴ “Mulapa wanyu Jesulu kalkunu malaku pitjanyťjikitjangku? Ka nyangatja wiyatu ngaranyi. Panya mamanya ngunytjunya tjana puťu paťara paťara ilungu. Ka nyanga manta ilkari kulu palurutu alatjitu ngaranyi wiyaringkunyťja wiya, panya Godalu nganmanyťju palyara wantinyťja alatjitu.”

⁵ Alatji tjana nyuranya anara wangkaku, palu paluru tjana kura ngunti wangkapai tjuťa. Panya anangu nyanga palu purunypa tjuťangkuya tjukurpa panya Godalu paluntjitja kulira wantingu mulamularingkunyťja wiyangku. Panya Godalu wangkanyangka ilkari utiringu munu paluru wangkanyangkaťu manta utiringu uru kutju ngarinyťjatjanu.

Uwa, paluru manta utiringkunyťjaku wangkangu, ka panya urunguru pakanu.

⁶ Ka panya ngulalta Godalu mina pulka iyara mantatja uwankara uru pulkangka iluntanu anangu nganmanyitja tjuta kulukulu.

⁷ Palu kuwari wanyu Godalu manta ilkari kutjupa kutjupa uwankara nyaalku? Wiya, paluru tjananya patara kanyini tjinu malatjaku panya nyara palula arangka paluru tjananya uwankara palu purunypatu wangkaku, ka wangkanyangka warungku kampara wiyalku alatjitu. Munu paluru anangu kura uwankara ngurkantara tjaralku munu tjananya wiyalku.

⁸ Uwa walytja tjuta, kulinmaya nyangatja watarkuriwiyangku, panya Mayatja Jesulu kampa kutjupa kulilpai nganana purunytju wiya. Panya nganana kulilpai kuli 1,000 rawa mulapa ngaranyangka, palu Mayatja Jesulu kulini nyara paluru rawa wiya tjinu kutju purunypa. Kala nganana kulilpai tjinu kutju rawa wiya, palu Mayatja Jesulu kulini tjinu paluru rawa mulapa kuli 1,000 purunypa. Alatji paluru witulya pulkangku kulilpai.

⁹ Tjinguru nyura kulini Jesunya rawa manyinanyangka-palku, munu nyura palulanguru kulini paluru ngunti kalkuntja-palku pitjanytja wiya ngaranyangka nyakula. Palu wiya, paluru anangu uwankaraku ngaltunytjungku rawangku patani tjana uwankarangku kura wantira Godalakutu aruringkuntjaku. Palu wiyangkampa tjinu malatjangka paluru tjananya ngurkantara tjaralku munu tjananya wiyalku, panya paluru ngaltunytju pulka tjanampa mukuringanyi kura wantira palunya kulira wanantjaku. Palulanguru paluru

rawaringkula ma-nyinara paṭani mapalku pitjanytja wiya.

¹⁰ Panya ngula Mayatja Jesunya urulyku wirkankuku, panya wati kutitjunkupai walingka tjarpanyangka nyuntu urulyaralpai, palu purunypa. Ka tjintu nyara palula ilkari wiyaringkuku rurku winki. Panya tjintu, pira, kililpi, manta winki uwankara warungku kampara urulku ka wiyaringkuku alatjitu.

¹¹⁻¹² Uwa, uwankara alatjitu warungku kampara wiyalku manta kulukulu, ka pala palulanguru nyura uti Mayatja Jesunya malaku pitjanytjaku patara tjukaruru nyinama Mama Godalawanu kutju, ka paluru tjinguru mapalku pitjaku. Ka tjintu nyara palula Godalu uwankara waru pulkangka wiyalku, ka tjintu pira kililpi tjuta kulukulu uwankara waruringkula ururingkula wiyaringkuku. ¹³ Palu palya, panya Godalu kalkunu manta kuwaritja munu ilkari kuwaritja kulu nganampa palyantjikitjangku, kala palumpa ala-ala patara nyinanyi. Panya ngura nyara palula anangu uwankarangku Godala wanganarangku kulilku munu tjukaruru nyinaku titutjara.

¹⁴ Uwa walytja tjuta, nyura tjintu nyara palumpa ala-ala patarampa tjukaruru palyanyku nyinama kura kutjupa kutjupa uwankara wantira. Ka nyuranya Jesulu pitjala nyakuku Godalawanu kutju wirura kurunpa rapa pukulpa nyinanyangka.

¹⁵ Munuya panyatja kulinmatu, panya Mayatja Jesunya rawaringkula kuwaripatu nyinanyi anangu tjuta palumpa mulamularingkula

wankaringkuny_tjak_u pa_tara. Tjukurpa nyan_gat_{ja} panya nganampa ku_ta panya wirungku Paulalu nganmany_tju nyurampa walkatjunu Godalu nintinnyangka.

16 Panya paluru lita tju_ta walkatju_ra iyaningi Jesuku walyt_{ja} tju_takutu, munu lita panya palula tjanala uwankarangka_tu tjukurpa palunya_tu walkatjunangi. Ka tjukurpa kutjupa tju_ta lita tju_tangka wituwitu nguwanpa ngaranyi. Ka panya Jesuku walyt_{ja} kutjupa tju_ta kunpu wiya ngurpa ngaranyi, munuya tjukurpa wituwitu panya palunya tjananya pu_tu kulira ngunti kampa kutjupa_ra wangkapai, panya palu purunypa, panya tjana Moseku tjukurpa ku_lu ngunti kampa kutjupa_ra wangkapai, palu purunypa. Nyara palulanguru panya Godalu tjananya tju_tu malatjanka pa_ra iyalku pika pulkatjara titutjara nyinanytjaku.

17 Palu walyt_{ja} tju_ta, nyura panya nyangaku nganmanypa nintiringu. Palulanguruyanku ngulu nyangama munuyanku atunymanama anangu kura tju_tangu nyuranya ngunti kurara iwara kurangka katinytjaku-tawara. Panya paluru tjana Godaku tjukurta tungunpungkula iwara kurangka ananyi munuya tjukurpa ngunti tju_ta kulira wangkapai. Ka nyura tjanala kulira wantima Godalanguru pa_turingkuny_tjak_u-tawara. Panya Godalu nyuranya wankaru kanyini nyura palula tjungu nyinanyangka.

18 Uwa, titutjarangkuya Mayatja Jesunya Christanya wan_anma, panya paluru nganampa wankarunkupainya nyinanyi ngaltunytju

pulkanya. Munuya titutjara palumpa
nintiringama.

Uwa, wanyula palunya titutjarangku mi-
rawanira walkunma wantinytja wiyangku. Uwa
mulapa.

Alatjituna walkatjunu. Palya.

Tjukurpa Palya
Portions of the Holy Bible in the Pitjantjatjara
language of Australia

copyright © 2019 Bible Society of Australia

Language: Pitjantjatjara

Translation by: The Pitjantjatjara Bible Translation Project, Wycliffe Bible Translators and Bible Society Australia.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2020-04-23

PDF generated using Haiola and XeLaTeX on 18 Apr 2025 from source files dated 31 Aug 2023

b29b7786-0954-5b75-82cb-3657182b63d6